

Iniziativa conforma al dretg?

En sia sessiun dall'jamna vegnenta sefatschenta il cussegl grond dalla catscha d'atun

DA HANS HUONDER / ANR

■ **10 229 vischinas e vischins han suttascret l'iniziativa cunter la catscha d'atun. Gliendisdis proxim ei quella tema el cussegl grond. El ha da decider schebein l'iniziativa ei valeivla ni buca.** El center dalla fatschenta stat il giudicament dall'iniziativa. Deputadas e deputai vegnan confruntai cun ils pareris che la regenza ha laschau elavurar. Parallelmein sper quels ha era il comite d'iniziativa incaricau in giurist d'examinar la cumpurteivladad dall'iniziativa cun il dretg federal. En special setracta ei dil dretg da catscha e dil forestalessar. Las partidas dil cussegl grond ein sefatschentadas dall'iniziativa en lur davosas sedutas da fracziun. Pcd e pbd vegnan alla conclusiun che l'iniziativa mondi buc a prau cul dretg surordinau, la ps ei dil meini che quei savessi tonaton esser il cass. Cun grond pli vegn era la cumissiun per ambient, traffic ed energia dil parlament cantunal alla conclusiun che l'iniziativa seigi d'annullar per motivs ch'el-



La catscha d'atun da tscharvas che vegn organisada oravontut per decimar il diember d'animals giuvens e femins fatschenta gliendisdis proxim il cussegl grond.

FOTO E. MONN

la cunterfetschi al dretg federal. L'iniziativa ei vegnida inoltrada ils 21 d'uost 2013 alla canzlia cantunala. Ella pretenda in sca-

mond dalla catscha d'atun. La catscha stoppi vegnir reglada aschia ch'ils plans da catscha vegnien contonschi en cuort

temps, en mintga cass denton duront la catsch'aulta ordinaria.

Iniziativa da catscha sparta ils meinis

Gliendisdis proxim sefatschenta il cussegl grond dall'iniziativa encunter la cascha speciala

DA HANS HUONDER / ANR

■ **Dapi che la catscha speciala vegn organisada el cantun Grischun cuschuna ella discussiuns. Per far ina fin a quellas ei vegniu lantschau avon dus onns in'iniziativa che prentenda la fin dad ella. Gliendisdis proxim tracta il cussegl grond quella iniziativa. Il pli dallas partidas ei dil meini ch'ella seigi buca conforma al dretg. Per quei motiv seigi ella d'annullar.** L'iniziativa encunter la catscha d'atun ei vegnida inoltrada ils 21 d'uost 2013 alla canzlia cantunala. 10 229 vischinas e vischins han sutsceret quella. Necessarias fussen stadas 3000 sottascripziuns. L'iniziativa prentenda ina midada dalla lescha da catscha cantunala. Igl artechel 11 duei vegnir midaus en quei senn ch'ils plans da catscha vegnan contonschi en cuort temps, en mintga cass denton duront la catsch'aula ordinaria. En quei connex duei era vegnir risguardau ina catscha els asils per aschia contonscher la regulaziun necessaria senza ina catscha speciala. Il temps da catscha ei da fixar aschia che la catsch'aula cuoza duront maximalmeins 25 dis duront il settember ed igl october cun la pusseivladad d'ina interrupziun dalla catscha da silmeins treis dis in suenter l'auter.

Nunvaleivel?

Sin fundament da pareris externs propona la regenza al cussegl grond d'annullar l'iniziativa. Ella constatescha che l'iniziativa cunterfetschi en plirs puncts alla lescha da catscha e la lescha d'uual federala. A quella conclusiun vegn era la cumissiun per ambient, traffic ed energia dil parlament cantunal. La maioritad dalla cumissiun propona alla legislativa da declarar l'iniziativa encunter la chatscha speciala per nunvaleivla. Ina minoritad dalla cumissiun



L'iniziativa encunter la catscha d'atun vegn tractada gliendisdis proxim dil cussegl grond. Nossa foto muossa ina part dils iniziants ensem cun Michael Kneller (sen.) che ha elavurau il pareri pil comite.

FOTO H. HUONDER

sustegn la valeivladad dall'iniziativa. La maioritad dalla cumissiun vegn alla conclusiun che l'iniziativa encunter la catscha speciala stetti en cuntradiziun evidenta cun il dretg federal surordinau, numnadameins cun la lescha da catscha e la lescha d'uual. A quella conclusiun vegn ella sin fundament d'ina expertisa giuridica ch'ei vegnida prentendida dalla regenza, d'ina expertisa arisguard la biologia dalla selvaschina sco era d'explicaziuns supplementaras dalla regenza cun occasiun dalla sesida dalla cumissiun. Ina maioritad dalla cumissiun excluda era ina nunvaleivladad parziala dall'iniziativa.

In giudicament critic

En lur sedutas da fracziun ein las partidas dil cussegl grond sefatschentadas dall'iniziativa da catscha. La Partida burgheis-democratica sustegn la proposta dalla regenza d'annullar l'iniziativa. Sin fundament dil grond diember da sottascripziuns per l'iniziativa e la malcontentientscha che regia ella populaziun eis ella denton dil meini ch'ei fetschi da basegns d'examinar criticameins ils temps da catscha. Propostas concretas fa la partida buca. Ella ei denton prompta da sustener ideas ord il cerchel dils catschadurs. Semegliontameins sco tier la Partida burgheis-democratica tuna ei era tier la Par-

tida cristiandemocratica. Ella ei medemameins dil meini che l'iniziativa cunterfetschi al dretg surordinau. Las varga 10 000 sottascripziuns muossien tonaton il malesser ella populaziun enviars la catscha d'atun. Sin fundament da quels fats ei la fracziun dalla pcd prompta da sefatschentar dallas propostas dils iniziants, senza denton metter en damonda la catscha da patente libra. Cun l'annulaziun dalla iniziativa duei vegnir impediu ch'il suveran voti davart ina iniziativa encunter il dretg. Empau auter tuna ei tier la fracziun dalla Partida socialdemocratica. Ina gronda maioritad da quella vegn a sustener l'iniziativa. Ina cuntra-

dicziun evidenta cun il dretg surordinau sappi buca vegnir documentada claramein. Dil dretg anora pudessi ei esser pusseivel da realisar l'iniziativa. Dalla pratica anora fussi quei denton nunraschuneivel ed ord vesta dalla politica da catscha era falliu. Per quei motiv seigi la Partida socialdemocratica encunter l'iniziativa. Fetg spartida en quella damonda ei era la fracziun dalla Partida liberaldemocratica/ils liberals. Ella seduta dall'jama vargada ei ina mesadad stada dil meini ch'ei seigi d'annullar l'iniziativa, l'autra buca. La pld ei denton claramein encunter l'iniziativa sco tala.

Cunterpareri

Sin fundament dils pareris che la regenza ha laschau elavurar han ils iniziants medemameins incaricau in expert extern da giudicar l'iniziativa sin sia valeivladad enviars il dretg surordinau, respectivameins il dretg federal. Il giurist Michael Kneller ei sefatschentaus dall'iniziativa e dils pareris sco era dil messadi dalla regenza per mauns dil parlament cantunal. Sias constataziuns vegnan ad ina altra conclusiun, numnadameins che las prentensiuns dall'iniziativa stattan buc en cuntradiziun cun il dretg federal da catscha e digl uual. «Tenor la constituziun cantunala sa il cussegl grond annullar l'iniziativa sulettameins sch'ella cunterfa evidentameins al dretg federal», constatescha il giurist. Tenor Michael Kneller ei quei buc il cass. Ni la lescha da catscha ni la lescha d'uual prescrivien al cantun co el hagi d'exequir la catscha. Sch'ins sappi schizun scumandar la catscha sco quei ch'ei seigi il cass el cantun Genevra sappien ins era restrenscher ella, per exempel cun abolir la catscha d'atun. En cass ch'il cussegl grond annullescha l'iniziativa quenta il comite d'iniziativa da recuorer encunter quei conclus. Igl empren tier la dertgira administrativa e la fin finala – sch'ei fetschi da basegns – era tier la dertgira federala.